

**REGOLAMENT pai**  
**CONCORS**

Fat bon cul At di G.P. N. 134 dai 09.06.2005, publicât te Liste Pretorie de Provincie di Pordenon dai 10-06-2005 e lâit in vore ai 26-06-2005.

## TABELE

Ogjet.....	Art. 1
Normis gjenerâls di selezion.....	Art. 2
Assunzion dal personâl a timp indeterminât.....	Art. 3
Recuisîts gjenerâi di acès.....	Art. 4
Recuisîts speciâi di acès .....	Art. 5
Ats di gjestion.....	Art. 6
Bant di concors .....	Art. 7
Publicitât dal Bant.....	Art. 8
Concors.....	Art. 9
Puescj di meti a concors.....	Art. 10
Modalitât di partecipazion al Concors.....	Art. 11
Tiermin de procedure concursuâl.....	Art. 12
Amission dai candidâts.....	Art. 13
Davuelziment des provis.....	Art. 14
Concors par esams.....	Art. 15
Concors par titui e esams.....	Art. 16
Preselezione.....	Art. 17
Prove scrite.....	Art. 18
Prove pratiche.....	Art. 19
Prove orâl.....	Art. 20
Comissions di exam.....	Art. 21
Adempiments de Comission.....	Art. 22
Funzionament de Comission di Valutazion.....	Art. 23
Segretari de Comission.....	Art. 24
Pais.....	Art. 25
Prove scrite.....	Art. 26
Durade des provis scritis e praticis.....	Art. 27
Adempiments dai concorincj tes provis scritis.....	Art. 28
Adempiments dai concorincj e de Comission a la fin des provis scritis....	Art. 29
Acès ai ats de procedure concursuâl.....	Art. 30
Formazion de graduatoriis.....	Art. 31
Presentazion dai documents relatîfs al concors .....	Art. 32
Risiervis e preferencis.....	Art. 33
Assunzion in servizi.....	Art. 34
Cors-concors.....	Art. 35
Personâl a timp determinât.....	Art. 36
Assunzion mediant dai Centris pal Lavôr.....	Art. 37

## **CJÂF I – PRINCIPIS GJENERÂI**

### **Art. 1**

#### **Ogjet**

1. Chest regolament al disipline lis modalitâts di assunzion in servizi te Provincie di Pordenon, i requisîts di acès e lis proceduris di selezion, tal rispiet dai principis previodûts dal art. 35 dal Decret Legjislatîf dai 30 di Març dal an 2001, n. 165.

### **Art. 2**

#### **Normis gjenerâls di selezion**

1. Lis selezions par taponâ i puecj disponibii te Provincie di Pordenon si davuelzin in maniere di garantî la imparzialitât e la transparence, la economicitât e la velocitât des proceduris ancje cul jutori di systems automatizâts, soredu te preselezion. Lis selezions a van fatis tun mût che al permeti di valutâ lis cognossincis, lis capacitâts dai candidâts di lavorâ tai chei puecj metûts a concors.

2. Lis modalitâts di concors pai puecj di lavôr in Provincie a garantissin il rispiet des oportunitâts parelis fra oms e feminis.

### **Art. 3**

#### **Assunzion dal personâl a timp indeterminât**

1. La assunzion a timp indeterminât te Provincie di Pordenon e ven fate cun contrat individuâl di lavôr, mediant di:

- a) proceduris di selezion pal aciertament de professionalitât domandade, che a garantissin in misure juste l'acès di fûr;
- b) ûs di graduatoriis concursuâls di altris Aministrazions Publichis, daûr di une convenzion, come che al è proviodût tal art. 17, come 13, de L.R. 17/2004;
- c) inviament dai iscrits tes listis di colocament daûr de leç in vore pes categoriis e pai profîi dulà che si domande dome la scuele dal oblic;

- d) clamade numeriche dai inabii cui mûts e cu lis proceduris stabilidis de Leç dai 12 di Març dal an 1999, n. 68;
- e) clamade direte nominative pal om vedul o pe femine vedue e pai fiis dal personâl des Fuarcis armadis, dal Cuarp nazionâl dai Vigjii dal Fûc e dal personâl de Polizie Municipâl e Provinciâl muart in servizi, e ancje des vitimis dal terrorisim e de criminalitât organizade, come che e proviôt la leç dai 13 di Avost dal an 1980 n. 446;
- f) proceduris di mobilitât esterne, daûr dal art. 30 dal D. Lgjs 30.03.2001 n. 165.

## **Art. 4**

### **Recuisîts gjenerâi di acès**

1. Al pues acedi al concors cui che al è chescj requisîts gjenerâi:
  - a. al è citadin talian o di un dai Stâts de Union Europeane;
  - b. al gjolt i dirits civîi e politics;
  - c. al à ducj i requisîts che al domande l'avîs di selezion;
  - d. nol à mancûl di 18 agns e nol è in etât di pension;
  - e. nol è stât escludût dal elektorât politic atîf;
  - f. al è abil al lavôr;
  - g. al à un titul di studi e altris requisîts specifics demandâts tal avîs di selezion;
  - h. nol è sot di condanis penâls che, daûr des disposizions in vore in materie, a impedissin di lavorâ te Pubbliche Aministrazion;
  - i. nol è stât mandât fûr dal puest di lavôr tune Pubbliche Aministrazion parcè che nol lavorave, o pûr parcè che al veve presentât documents fals o viziâts di invaliditât no sanabile;
  - l. al è in regule cul servizi militâr, pai citadins che a son obleâts a fâlu.
2. Tai bants di concors si varà di cjatâ scrits i requisîts che si trate sore e lis speciâls carateristichis dai profîi professionâi di riferiment.
3. I candidâts a varan di jessi in possès dai requisîts prescrits ae date di scjadince fissade tal bant di concors pe presentazion de domande di amission o ae date de prime prove scrite, par chei concors che no proviodin la presentazion de domande preventive di partecipazion.

## **Art. 5**

### **Recuisîts speciâi di acès**

1. Stant fer ce che al proviôt l'art. 4 di chest regolament, in relacion a la categorie di partignince de figure professionâl ogjet de selezion, si domande chescj titui di studi:
  - *categorie A*: licence de scuele dal oblic (diplome di licence di scuele medie inferiôr, o licence di scuele elementâr dentri dal an 1962 o come che a proviodin disposizions in materie di elevament dal oblic scolastic vignudis fûr dopo);

- *categorie B*: licence de scuele dal oblic come sore, se dal câs cun atestât professionâl bon pal adempiment des funziions relativis a une cierte posizion professionâl e/o cun abilitaziions specifichis;
- *categorie C*: diplome di scuele medie superiôr (diplome di maturitât) bon pes funziions di chê posizion professionâl;
- *categorie D*: diplome di lauree o diplome universitari bon pes funziions di chê posizion professionâl, cu la specializazion e/o abilitazion dal câs.

3. Altris requisîts specifics, colegâts a profîi professionâi specifics, a son domandâts clârs tal Bant.

4. Il candidat al à di vê ducj i requisîts gjenerâi e speciâi domandâts ae date di scjadince dal tiermin stabilît pe presentazion de domande di amission o ae date di davuelziment de prime prove di concors pai concors dulà che no covente la domande preventive di partecipazion.

## **Art. 6**

### **Ats di gjestion**

1. I ats di gjestion che a rivuardin lis proceduris di assunzion, dulà che no je proviodude la competence di un orghin diferent, ju adote il Dirigjent dal Servizi di Gjestion dal Personâl, su la fonde dal Plan trienâl des assunziions e/o dal Plan Esecutîf di Gjestion.

## **CJÂF II – PROCEDURIS DI CONCORS**

### **Art. 7**

#### **Bant di concors**

1. Il bant di concors, fat bon cun determinazion dal Dirigjent dal Servizi di Gjestion dal Personâl, al à dentri dutis lis informaziions che a coventi pal davuelziment des operaziions di concors e in specialitât:

- a) il tiermin e i mûts di presentazion de domande preventive di partecipazion;
- b) i mûts di partecipazion al concors cuant che no covente la presentazion preventive de domande;
- c) lis datis, il lûc e i mûts di davuelziment des provis di concors;
- d) i mûts di comunicazion ai candidatâs dal esit des provis e di convocazion par chês altris provis;
- e) i tims e i mûts di presentazion des domandis di jutori e di plui timp pai candidatâs inabii;
- f) lis materiis ogjet des provis di concors e la votazion minime domandade pe amission aes provis dopo;
- g) i requisîts sogjetîfs gjenerâi e speciâi domandâts par chel lavôr;
- h) i titui che a dan la precedence o la preference a paritât di ponts;
- i) se dal câs, la prevision di formis di preselezion e i mûts di davuelziment de preselezion;
- l) lis percentuâls dai puescj (se andi son) risiervâts di leçs a pro di ciertis categoriis;
- m) lis garantiis pes oportunitâts parelis tra om e femine pal acès al lavôr;
- n) la pussibilitât par altris Aministrazions di doprà la graduatorie (L.R.17/2004);
- o) cualsisedi altre informazion buine o domandade di leçs o di regolaments.

2. Tai concurs che a proviodin la presentazion de domande preventive di partecipazion il dirigjent competent al à la facultât di prorogâ o di tornâ a vierzi i tiermins dal concurs se il numar dai concorincj nol baste par garantî une buine selezion.

Ta chest câs a valin lis domandis presentadis prin, e i candidâts a puedin completâ la domande, dentri dal tiermin gnûf, cu la documentazion che e covente o presentâ declarazions gnovis in sostituzion di certificazion e di at di notorietât.

3. Parimentri, daûr motivazion e tal interès di ducj, il concurs za bandît al pues jessi revocât prin de scjadince. Il proviodiment di revoche al va notificât a ducj chei che a àn presentade domande di partecipazion.

4. Il Concors che nol proviôt la preventive presentazion de domande di partecipazion al pues jessi revocât o sospindût dome mediant di comunicazion di fâ cun chei stes mûts di publicazion dal Bant e, dut câs, no dopo dai siet dîs prin de date de prime prove di concurs.

## **Art. 8**

### **Publicitât dal Bant**

1. Il Bant di concurs, che al ven publicât sul sît Internet de Provincie e picjât te Liste Pretorie, al à di vê la publicitât juste pal puest metût a concurs.

2. Il Bant al va inviât in specialitât:

- a) a dutis lis Provinciis talianis;
- b) a ducj i Comuns de provincie di Pordenon;
- c) a la Direzion Regjonâl pes Autonomiis Locâls;
- d) al Ufici Teritoriâl dal Guvier - Prefeture;
- e) a chei Ents e a chês Associazions che a àn il compit di prudelâ lis categoriis ametudis a tutele cuant che a son puescj di risiervâ;
- f) ai orghins locâi di stampe;
- g) ai Centris pal Lavôr de provincie di Pordenon;
- h) ai Informezovins de provincie di Pordenon.

3. L'At di aprovazion dal Bant al pues proviodi ancje la publicazion dal avîs di concurs su la G.U. de Republiche Taliane e sul BUR de Regjon Friûl Vignesie Julie, se il puest metût a concurs lu proviôt.

4. Fra la date di publicazion dal bant e la date di scjadince dal tiermin pe presentazion des domandis di partecipazion o pal davuelziment de prime prove di concurs no puedin passâ, pal solit, mancun di 30 dîs.

## **Art. 9**

### **Concors**

1. Il concurs al è une forme di procedure di selezion come che si intindile tal precedent art. 2. Al pues jessi interni o public, dome par esams o par titui e par esams; al pues cjapâ ancje la forme dal cors concurs.
2. Daûr des disposizions in vore, la Aministrazion e pues individuâ puescj cun professionalitâts specifichis cun acès risiervâts al personâl interni in possès di requisîts specifics.
3. La Aministrazion e pues ancje individuâ i puescj risiervâts a la progression verticâl, daûr dal Regolament dal Ent.

## **Art. 10**

### **Puescj di meti a concurs**

1. A puedin lâ a concurs ducj i puescj disponibii. Stant fermis lis risiervis di leç, a vegnin considerâts puescj disponibii sedi chei vueits a la date dal Bant di concurs, sedi chei che a restaran vueits par vie dai pensionaments previodûts pai dodis mês a vignî.

## **Art. 11**

### **Mûts di partecipazion al Concors**

1. Se il Bant nol ves di proviodi la presentazion preventive de domande di partecipazion al concurs, a vignaran ametûts a partecipâ a la prime prove dal concurs ducj i candidâts che si presentaran di persone ta chê dì, ta chê ore e ta chel sît che al dîs il Bant, e che a consegnaran il modul di iscrizion e altris documents che a vessin di coventâ.
2. Il candidat al varà di presentâsi di persone, pene la esclusion, dentri dal orari specificât tal Bant.
3. Se il Bant di concurs al previôt la presentazion preventive de domande di partecipazion, la domande e va butade jù in cjarte semplice e indreçade a la Aministrazion Provinciâl di Pordenon e presentade diretamentri al Uffici Protocol o a une altre strutture incaricade, o trasmetude dome a mieç di letare raccomandade cun avîs di riceviment o par fax o par pueste eletroniche, cun nissun altri mieç, tai mûts indicâts e dentri dal tiermin perentori fissâts tal bant di concurs.
4. Se si mandile par fax o par pueste eletroniche, a la domande si à di zontâi une copie semplice di un document di ricognossiment dal candidat.
5. La date util pe validitât des domandis e je chê di spedizion che e risulte dal timbri dal Uffici postâl che le acete, o chê di riceviment che e risulte dal timbri metût dal Uffici Protocol de Provincie o di une altre strutture, o pûr, par ce che ur inten aes domandis mandadis par fax o par pueste eletroniche, la date e la ore di spedizion che si cjate tal document.
6. La domande e va fate daûr dal scheme zontât tal bant di concurs, cun dutis lis indicazions che i candidâts a son obleâts a dâ.

7. La Aministrazion Provinciâl no si assum nissune responsabilît pe pierdite di comunicazions se il concorint al fale la direzion, al fale di spedî par fax o pueste eletroniche, o se al mande tart o nol mande propit comunicazion dal gambiament de sô direzion che al à metût te domande. La Aministrazion no rispuint dai erôrs des puestis o dai problemis telegrafics o dut cês causâts di tierçs, di accidents o di fuarce maiôr.

8. La firme di meti te domande no je sogjete a autenticazion. Se e à dentri declarazions sostitutivis di at notori, la domande e va firmade denant dal dipendent adet, o pûr e va presentade insiemit cuntune copie fotostatiche, no autenticade, di un document di identitât valit dal interessât. La domande e la copie fotostatiche dal document di identitât a puedin jessi inviadis par fax o par pueste eletroniche.

9. Par partecipâ ai Concors de Provincie di Pordenon no si à di paiâ nissune tasse.

10. Lis domandis di partecipazion e i modui di iscrizion ogjets di chest articul a puedin vê carateristichis di declarazion sostitutive di certificazion e/o di declarazion sostitutive di at di notorietât a ducj i efets de leç: il Bant dal Concors lu stabilis cês par cês.

## **Art. 12**

### **Tiermin de procedure di concors**

1. La procedure di concors e va sierade, pal solit, dentri di 4 mês a partî de dì che si è davuelte la prime prove stabilide dal bant di concors.

2. Lis Comissions di Valutazion a puedin slungjâ la durade de procedure in relacion a esigjencis specifichis.

## **Art. 13**

### **Amission dai candidâts**

1. Tai concors che no previodin la presentazion preventive de domande di partecipazion, ducj i candidâts che si iscrivin cui mûts detâts dal Bant, a son ametûts a partecipâ a la prime prove di concors cun riserve di verifiche dal possès dai requisîts che a saran ogjet di aciertament al at de assunzion.

2. Pai concors dulà che e vûl la presentazion preventive de domande di partecipazion, il Dirigjent dal Servizi Gjestion dal Personâl al adote l'at di amission o di escluson dai candidâts, e in cês di escluson al esplicite i motîfs. L'at al ven adotât su la fonde des declarazions rindudis dai candidâts tes domandis, cu la riserve di verificâ po che i candidâts a vedin ducj i requisîts al moment de assunzion.

3. Par sveltî lis pratichis o tal cês di insurencis sul possès dai requisîts e je proviodude la amission automatiche cun riserve par ducj chei che a àn presentade la domande, e la verifiche des declarazions rindudis e dai requisîts che pardabon al à il candidat al moment de assunzion in servizi.

4. Se i requisîts domandâts a vessin di vignî a mancjâ, il candidat al ven escludût dal concors; il Dirigjent dal Servizi Gjestion dal Personâl ur da comunicazion ai candidâts che no vegnin ametûts

par telegram o par letare raccomandade cun avîs di riceviment, cu la indicazion dai parcè che a son restâts fûr dal concurs.

5. Il candidat al pues jessi escludût dal concurs pal difiet dai requisîts demandâts in cualsisedi moment de procedure di concurs o di assunzion.

## **Art. 14**

### **Davuelziment des provis**

1. Il Bant al fisse, pal solit, la date, il lûc e i mûts di davuelziment di dutis lis provis di concurs. Cuan che nol è cussì, il diari des provis ur al comuniche ai candidatâs la Comission di Valutazion par letare raccomandade cun avîs di riceviment trasmetude no mancul di cuindis dîs prin che a tachin lis provis o cun altris mûts proviodûts dal Bant.

2. Lis provis dal concurs no puedin davuelzisi ni tai dîs di fieste ni, daûr de Leç dai 8 di Març dal an 1989, n. 101, tai dîs di fiestis sagraadis ebraichis palesadis tal decret dal Ministri dal Interni mediant di publicazion te *Gazzetta Ufficiale* de Republiche.

3. Ai candidatâs ametûts a lis provis di concurs ur rivarà comunicazion de votazion indicade te prove fate, che e vignarà picjade ancje te liste de Provincie e inseride tal Sît Internet.

4. Chestis comunicazions a varan di vê dentri ancje la date e il lûc di davuelziment de prove, se no son za saltâts fûr tal Bant.

5. Chestis formis di comunicazion a valin a ducj i efjets tant che convocazion formâl a partecipâ a la seconde prove.

6. I esams orâi a van fats tun sît viert al public, vonde grant par permeti la partecipazion di plui int pussibil.

7. Al tiermin des provis orâls la Comission e comuniche la votazion di ogni candidat, cuntun avîs picjât di pueste fûr dal locâl dulà che si è davuelte la prove o te Liste e publicât sul Sît Internet de Provincie.

8. Se e scugnarà dividi i orâi su plui zornadis, a la fin di ogni zornade la Comission e publicarà lis valutazions come che al è spiegât tal pont 7.

## **Art. 15**

### **Concors par esams**

1. I concors publics pal solit a vegnin bandîts te forme dal concors par esams.
2. Il Bant al stabilîs la forme e il numar des provis in relazion al profîl professionâl dal puest metût a concors.
3. I bants di concors a puedin proviodi provis di preselezione e, in alternative o in plui de prove scrite, une prove pratiche, ancje sot forme di cuesîts belançâts e/o a rispueste multiple o tune schirie di domandis a rispueste curte par viodi ce abilitâts e ce professionalitât che a puedin vê i candidâts tes ativitâts che a varessin di davuelzi.
4. I bants a puedin ancje proviodi esams in dôs provis (duti dôs scritis, o une scrite e une pratiche), e une prove a vôs, se dut chest al ves di coventâ par verificâ chê professionalitât in specialitât.
5. Al ven ametût a la prove a vôs cui che al passe la prove scrite e/o pratiche cun votazion, par ogni prove, no plui basse di 21 su 30 (o ecuivalente).
6. La valutazion ultime le da la some di dutis lis votazions cjapadis:
  - te prove di preselezione, cuant che lu dîs sclet il Bant;
  - tes provis scritis o praticis o teorichis e praticis insiemit (medie dai vôts);
  - te prove orâl.
7. La prove orâl si passile cuant che si rive adore a cjapâ no mancul di 21/30 (o ecuivalent).
8. Il bant di concors al pues comandâ a la Comission di valutazion che e prepari lis provis di selezion cul jutori di aziendis specializadis o di esperts te selezion dal personâl o dut cês di sogjets competents in materie, sedi par ce che i inten a ogni fase de prove, sedi par dut ce che al rivuarde il davuelziment des provis (elaborazion dai cuesîts, soministrazion ai candidâts, corezion).
9. I sogjets che si fevele tal come precedent a puedin ancje vê incarghis di consulente pal supuart aes operazions relativis a un o a plui concors dentri di un dât timp.

#### **Art. 16**

#### **Concors par titui e par esams**

1. La Amministrazion e pues bandî concors che a previodin ancje la valutazion dai titui.
2. I bants dai concors par titui e esams a vuelin simpri la presentazion de domande preventive di partecipazion.
3. I criteris pe valutazion dai titui a vegnin sielzûts prime che lis provis scritis a partissin; i ponts pai titui ur van dome a chei candidâts che a àn cjapât part aes provis prime de valutazion de prove scrite o pratiche.
4. Pai titui no si pues ricevi plui di 10 ponts in dut, daûr di ce che al dîs il bant, che al da ancje i criteris gjenerâi di valutazion e al specifiche cuâi che a son i titui che a vegnin cjapâts in considerazion, che a puedin jessi riferîts a une o a plui di une categorie fra chestis:

- a) titui di servizi;
- c) titui di studi;
- c) altris titui.
- d) curriculum professionâl.

## **Art. 17**

### **Preselezione**

1. Il Bant, pes provis di preselezione, al stabilis il numar massim dai candidâts che, dopo che lis àn passadis, a van a fâ lis provis di concors. La preselezione le fâs la Comission stesse, che e pues ancje fâsi judâ dal Uffici Gjestion dal Personâl e/o di aziendis specializadis o di esperts in selezion dal personâl. La preselezione e pues jessi fate ancje prime che si insedi la Comission: alore la aziende specializade o i esperts in selezion di personâl a fasin riferiment al Servizi Gjestion dal Personâl.
2. Daûr di ce che al è scrit tal Bant, la valutazion totâl cjapade te preselezione e pues tornâ buine, in dut o in part, pe determinazion de valutazion finâl.

## **Art. 18**

### **Prove scrite**

1. La prove scrite di teorie e pues jessi un teme, une relazion, la espression di une o di plui opinions, la rispueste curte a un o a plui cuesîts; e pues domandâ di rispuindi a plui domandis a rispueste multiple, cu lis rispuestis pussibilis za prontis: il candidat al à nome di sielzi chê che i pâr juste.
2. La prove scrite di teorie e di pratiche insiemit e pues domandâ di butà jù schemis di ats juridics e aministratîfs o tecnicos, di fâ studis di fatibilitât su sieltis organizativis, programs, progjets o intervents, di fâ progjets e elaborazions grafichis, di cjatâ fûr proceduris o percors operatîfs, di risolvi câs, di figurâ intervents inserîts tun contest teoric.

## **Art. 19**

### **Prove pratiche**

1. La prove pratiche e pues jessi une elaborazion grafiche, domandâ l'ûs dal ordenadôr, di altris struments o machinis che si doprin tal puest metût a concurs. E pues domandâ al candidat ce che al fasarès tune cierte situazion.

## **Art. 20**

### **Prove orâl**

1. La prove orâl e je un colocui individuâl su lis materiis dal bant.
2. Tal cors de prove orâl la Comission e pues verificâ se il candidat a fevele une des lenghis forestis dal Bant o se al sa doprâ cierts programs pal ordenadôr.
3. Prime di tacâ la prove orâl, la Comission e pues sielzi ce cuesîts che e à di sometî ai candidatâs, che a àn di gjavâju a sorte, tun mût decidût prin e descrit tai verbâi.
4. La Comission si cjape facultât di verbalizâ i cuesîts sometûts ai candidatâs e lis lôr rispuestis o di fâ di mancul.

## **Art. 21**

### **Comissions di valutazion**

1. Lis comissions di valutazion lis clame dongje cuntune determinazion il Dirigjent dal Servizi Gjestion dal Personâl. A son formadis di esperts tes materiis di concurs, e i membris a son dirigjents o funzionaris de Aministrazion Provinciâl o di altris Aministrazions, docents e altris sogjets competents in merit. No puedin fâ part de Comission i components dai orghins di direzion politiche de aministrazion interessade, ni chei che a àn carichis politicis o che a fasin di rapresentants sindacâi a cualsisedi nivel. Almancul un tierç dai puescj tes comissions di concurs, se propit no son impediments justificâts, al è risiervât aes feminis.
2. Tal rispjet di chescj principis, lis Comissions a son formadis, in detai, dal Segretari Gjenerâl o di un Dirigjent, miôr se sielzût fra i responsabii dai Setôrs dulà che a laran a vore i vincidôrs, cun funziions di president, e di doi esperts cjatâts fûr cui criteris descritti tal come precedent; lis funziions di segretari lis davuelç un dipendent di categorie no plui basse de C, tignût cont de cualifiche dal puest metût a concurs. Se i esperts a son dipendents de Provincie o di une altre Aministrazion Publiche, no varan di jessi incuadrâts tune categorie plui basse di chê dal puest metût a concurs.
3. Tes seleziions di dipendents a timp determinât, il president de Comission al pues jessi un funzionario di cat. D, titolâr di posizion organizative.
4. La presidence des Comissions dai Concors pe assunzion di Dirigjents i spiete al Segretari Gjenerâl, o, se lui nol è disponibil o a son impediments, al Vice Segretari, daûr di ce che al prescîf il Statût provinciâl.

5. Il president e i membrs des commissions di valutazion a puedin vignê sielzûts ancje fra il personâl in pension che al vedi vude, intant che al jere atf in servizi, la cualifiche domandade pai puescj metûts a concors.
6. Ancje in vie preventive, in câs di impediment grâf e documentât dai components titolârs de Comission, a puedin vignê nomenâts membrs suplents prons a rimplaçâ i titolârs se al ves di vignê fûr cualchi probleme e fin che nol è sierât il concors.
7. A chestis commissions si puedin unî membrs in plui pes materiis speciâls e pai esams di lenghe foreste, o par valutâ lis cognossincis informatichis dai candidâts.
8. I membrs in plui a cjapin part in dut e par dut ai lavôrs de Comission, tal moment stes che cheste si va a insedâ.
9. Se i partecipants a son un grum, il Dirigjent dal Servizi Gjestion dal Personâl, su domande de Comission, al nomene un o plui adets al control a supuart de Comission, intant che si davuelzin lis provis scritis o pratichis, fra i dependents de Provincie. I adets al control a metin in pratiche lis diretivis che ur da la Comission.
10. I components des Comissions che par cualsisedi reson a vessin di interrompi il lôr rapuart di lavôr tal cors de selezion, a puartin indenat instès la lôr funzion di commissaris, se la Amministrazion no ju rimplice.

## **Art. 22**

### **Adempiments che i spietin a la Comission**

1. I components de Comission, dopo cjapade vision de liste dai partecipants, a declarin che àn situacions di incompatibilitât cun chescj, daûr dai articui 51 e 52 dal codiç di procedure civîl. Cheste declarazion si cjatile tal verbâl.
2. I lavôrs de Comission si davuelzin ta chest ordin:
  - a) verifiche de regolaritât de costituzion de Comission, esam di istancis di apelazion, se andi son;
  - b) esam dai documents che a rivuardin il concors e, in specialitât: l'at di indizion dal bant, lis normis di chest Regolament, la pubblicitât e la difusion dal bant;
  - c) determinazion dai criteris di valutazion des provis e, se andi son, dai titui;
  - d) i candidâts ametûts a cjapin at de lôr amission, se dal câs;
  - e) determinazion dal calendari des provis di esam, se dal câs;
  - f) determinazion dai mûts di davuelziment des provis pai candidâts che a àn domandât jutori o plui timp par davuelzi lis provis;
  - g) davuelziment des provis di concors;
  - h) valutazion dai titui, se e va fate;
  - i) judizi su lis provis di concors;
  - l) davuelziment de prove orâl;
  - l) formazion des graduatoriis.

## **Art. 23**

### **Funzionament de Comission di valutazion**

1. La Comission e à simpri di lavorâ a la presince di ducj i siei membris, par che il concurs al resti valit.
2. Pal solit la Comission e da une votazion uniche come risultât di une discussion colegjâl. Se no ducj i membris a son de stessee idee, si dividerà il vôt plui alt pussibil in parts companis par ducj i Comissaris e ognidun di lôr al varà di pandi la sô valutazion, dentri dai limits dai ponts che al pues disponi. La some aritmetiche dai vôts parziâi dâts cun chest criteri e darà i ponts totâi di assegnâ. La Comission e delibare cun vôt palês. No si pues fâ di mancûl di votâ. Il Comissari che no si sint di votâ al à facultât di domandâ di meti a verbâl il parcè o cualis che al pense che a sedin lis iregularitâts tal davuelziment dal concurs.
3. Des operations di concurs e des deliberacions de Comission al va butât jù un verbâl, che ducj i Comissaris e il Segretari a àn di firmâ e di siglâ in ogni pagjine.

## **Art. 24**

### **Segretari de Comission**

1. Il Segretari de Comission al à funziions di certificazion. Al è responsabil de redazion dai verbâi, dulà che al à di descrivi dutis lis fasis dal concurs. Nol partecipe cul so judizi a nissune des decisions de Comission.
2. Al à di custodî i ats dal concurs e di fâ ce che i dîs la Comission. Al à di butâ jù un verbâl par ogni sedude.

## **Art. 25**

### **Pais**

1. Lis pais pai membris esperts e pal Segretari des Comissions di valutazion lis decît la Zonte Provinciâl secont la cualifiche dal puest di meti a concurs.
2. Ai dependents provinciâi, ai components o al segretari de Comission, ur spiete la paie dome se a davuelzin la ativitât di Comissaris fûr dal orari di servizi.
3. Ai Dirigjents che a fasin part des Comissions di valutazion dai concurs a cualsisedi titul, no ur spiete nissune paie, daûr di ce che al dîs l'art. 24, come trê, dal D.Lgjs 30.03.2001, n. 165.

4. Tal câs che no sedin dipendents dal Ent disponibii a jessi nomenâts di Comission di concors o tant che adets al control, par urgjence e par necessitât, si ju nomene di ufici.
5. Lis aziendis specializadis o i consulents professionâi che a puedin vignî interpelâts pes preselezion o par altris moments dal concors, se no son te Comission, a son paiâts a contrat.
6. Ai components des Comissions che no son dipendents de Aministrazion Provinciâl e che a son a stâ fûr sede ur vegnin ancje rimborsadis lis spesis di viaç e di permanence, se andi son.

## **Art. 26**

### **Prove scrite**

1. Te stesse dì e subit prin di ogni prove scrite, la Comission e prepare trê tipologjiis par ogni prove. Lis tipologjiis a restin segretis e al è improibît pandilis.
2. Se a 'ndi è resons validis, che a van precisadis tal verbâl, la Comission e pues preparâ lis tipologjiis ancje te dì prin de prove scrite.
3. Ta chest câs la Comission e fasarà dut il pussibil par garantî la plui totâl segretece su lis tipologjiis, e indi darà at tal verbâl de sedude fate par preparâlis.
4. Se la prove scrite o pratiche e domande di rispuindi a plui di 10 cuesîts, la Comission e pues preparâ ancje dome une tipologjie.
5. Come che lis àn butadis jù, i components de Comission a àn di sierâ lis tipologjiis in bustis sigjiladis e firmadis par di fûr sui ôrs.
6. A chê ore che e je fissade ogni prove, il President de Comission di valutazion al fâs fâ l'apel nominâl dai partecipants e, come che e ven aciertade la lôr identitât personâl, ju fâs sentâ di mût che no puedin fevelâsi fra lôr. Duncje i domande a un dai candidâts di gjavâ a sorte il teme di fâ.
7. Tal câs presentât dal come 4, si va subit a dâ fûr ai candidâts la copie dal test preparât.
8. Chestis proceduris si aplichin ancje a lis provis praticichis che si davuelzin te stesse forme di chês scritis.

## **Art. 27**

### **Durade des provis scritis e praticichis**

1. La durade di ogni prove le stabilis la Comission in relazion al timp che si stime che al covente par davuelzile.

## **Art. 28**

### **Adempiments dai partecipants tal cors dal davuelziment des provis scritis**

1. Tal cors des provis scritis nol è permetût ai partecipants di fevelâsi o di scrivisi fra di lôr, ni di metisi in relazion cun chei altris, se no cui membris de Comission di valutazion. Ai partecipants al è anje improibît di doprâ telefonis celulârs, che la Comission e à dut cês la facultât di ritirâ.
2. Par che a restin valits, i lavôrs a van scrits nome su la cjarte cul timbri dal ufici e cu la firme di un dai membris de Comission di valutazion.
3. I candidâts no puedin quartâsi daûr cjarte par scrivi, notis scritis a man, libris ni publicazions di nissune sorte. Cul permès de Comission di valutazion a puedin cjalâ i tescj di leç, i manuâi no comentâts e autorizâts de Comission, i dizionaris.
4. Chel participant che al ves di disubidî aes regulis culi descritis o che al ves di copiâ part dal teme o il teme intîr, al ven escludût dal concurs. Se la Comission si inacuarç che un o plui candidâts a àn copiât, dut o part, ju mande ducj fûr.
5. La Comission di valutazion e sta atente che lis regulis a sedin rispjetadis, e e à la facultât di cjapâ i proviodiments dal cês. Par chest, pal solit, almancul doi membris o pûr un membri e il segretari che al cure il verbâl a àn di restâ te sale dulà che a son in cors i esams..

### **Art. 29**

#### **Adempiments dai partecipants e de Comission al tiermin des provis scritis**

1. Al candidat i ven consegnât dut il materiâl che i covente par davuelzi lis provis, cun dôs bustis: une grande e une piçule, che e à dentri un sfoiet blanc.
2. Une volte che il candidat al à davuelt il teme, cence ni firmâlu ni segnâlu in nissune altre maniere, al met il sfuei o i sfueis dentri de buste grande. Al scrîf il so non e il so cognon, la dì e il lûc che al à nassût tal sfoiet blanc e lu siere te buste piçule. Dopo al met anje al buste piçule dentri di chê grande, al siere sù dut e lu consegne al President de Comission o a cui par lui. Il President de Comission, o cui par lui, al firme di traviers su la buste, di mût di cjapâ sot de la sô firme l'ôr che si siere e il rest de buste.
3. Quant che la prove di preselezione o la prove scrite e je fate di une schirie di cuesîts a rispueste multiple cun rispuestis pussibilis za prontis di podê sielzi chê juste, la Comission e vise in timp i candidâts su ce maniere che a àn di davuelzi la prove (se a àn di corezi o ce che a àn di fâ) e sui criteris ogjetîfs di valutazion.
4. Se al covente, la Comission e prepare un stampât di pueste par mostrâ cemût che e va davuelte la prove. E pues dâlu fûr ai candidâts tal moment che si iscrivin o dut cês presentâlu prin che i candidâts a tachin a davuelzi la prove.

5. Se la Comission e decît di preparâ il stampât, tai dîs subit dopo de prove, e darà ordin di publicâ sul Sît Internet de Provincie lis madrîs di corezion cu la rispueste juste par ogni cuesît.

### **Art. 30**

#### **Acès ai ats de procedure di concors**

1. Al è permetût l'acès a ducj i ats e ai documents de procedure di concors, comprendûts chei presentâts dai candidâts, tal rispiet di ce che e dîs la normative in vore in materie di tutele de riservatece.
2. Vie pal davuelziment dal concors l'acès al ven diferît a la fin dal procediment, simpri se il diferiment nol impedîs la tutele di posizions che a mertin dal pont di viste juridic.

### **Art. 31**

#### **Formazion des graduatoriis**

1. Finîts i esams, la comission e bute jù la graduatorie di merit definitive, de votazion totâl plui alte a chê plui basse. La valutazion finâl e ven fûr de some di chescj ponts:
  - ponts cjapâts te prove di preselezion (se il Bant le vûl);
  - ponts pai titui, tai concors par titui e par esams;
  - ponts de prove o des provis scritis (tal câs che a sedin dôs, e vâl la medie de valutazion);
  - ponts prove orâl
2. La Comission, a la fin dai lavôrs, e rint publiche la graduatorie di merit cul fâle picjâ su la Liste e cul metile sul sît Internet de Provincie.
3. La graduatorie definitive dal Concors le fâs buine la Determinazion dal Dirigjent dal Servizi Gjestion dal Personâl che a paritât di merit, al ten cont des preferencis che si fevele tal art. 33 che al ven dopo. La graduatorie e je valide subit.
4. Le graduatoriis a vegnin publicadis te Liste Pretorie e sul Sît Internet de Provincie.
5. Daûr dal art. 91, come 4, dal Decret Legjislatîf dai 18 di Avost dal an 2000, n. 267, lis graduatoriis a restin buinis par trê agns a partî de date di publicazion par cuvierzi chei puescj che a vessin di restâ vueits e disponibii, fûr che pai puescj istituûts o trasformâts dopo de indizion dal concors.
6. Par puescj vueits e disponibii si intindin tant chei che a restin libars cul lâ dal timp che chei che la Zonte e decît di dâ su la fonde dal Plan trienâl des assunziions o dal Plan Esecutîf di Gjestion, baste che si trati di puescj za istituûts al moment de publicazion dal relatîf bant di concors.

7. Lis graduatoriis dal concurs public a puedin vignî dopradis ancje par assunziions a timp parziâl e/o a timp determinât.
8. La Aministrazion e pues ancje doprâ lis graduatoriis in aplicazion dal art. 16, come 2, de L. dai 12 di Març dal an 1999, n. 68 “Norme per il diritto al lavoro dei disabili” (Normis pal dirit al lavôr dai inabii), ai fins dal adempiment dal oblic che si fevele tal art. 3 de stesse leç.
9. Cui che al rinuncie a la assunzion a timp indeterminât al ven metût fûr de graduatorie.
10. Tes graduatoriis dai concurs publics, cui che al rinuncie a la assunzion a timp determinât nol reste fûr de graduatorie pe assunzion a timp indeterminât.
11. Tes graduatoriis dai concurs publics, cui che al cjape servizi a timp indeterminât tune altre Aministrazion publiche che e à doprade la graduatorie de Provincie, come che e previôt la L.R. 17/2004, al va fûr de graduatorie.
12. In dutis lis graduatoriis di concurs, cui che al rinuncie a la assunzion a timp indeterminât tune altre Aministrazion convenzionade daûr de L.R. 17/2004, nol piert la posizion in graduatorie par une assunzion in Provincie.

## **Art. 32**

### **Presentazion dai documents relatîfs al concurs**

1. I participants che a vedin passade la prove orâl a àn di provâ, mediant di une declarazion sostitutive di certificazion o di at notori, dentri di 15 dîs a partî de dì dopo di chê che e à fate la prove, di vê i titui di riserve, di precedence e di preference, a paritât di valutazion, che a àn za declarât tal modul di iscrizion o te domande di partecipazion. Di chescj documents a àn ancje di risultâ che i candidâts a àn chei requisîts pe dì che a van a davuelzi la prime prove di concurs o pe dì che al scjât il tiermin pe presentazion de domande di amission, se il Bant le previôt;
2. Dut chest al vâl par ce che i inten al possès dai requisîts pe partecipazion al concurs o pai titui che il candidât al vedi declarât te domande. Se il candidât nol presente i documents o lis autocertificazions o lis declarazions sostitutivis di at notori che a atestin che al à i requisîts, alore al ven escludût dal concurs, tal rispjet des normis in vore in materie di declarazions sostitutivis. Se i candidâts no son in stât di provâ che a àn pardabon i titui che a àn declarâts o a provin di vê titui diferents di chei declarâts te domande, la valutazion dai titui e gambiarà.
3. Tai concurs publics e tes provis di selezion al ven aciertât il possès dai requisîts gjenerâi di acès a la Pubbliche Aministrazion, i requisîts specifics che al domande il Bant pal puest metût a concurs, i titui declarâts e utii pe valutazion ultime e i titui di preference e/o di precedence tal moment de assunzion, cun riferiment a la date di davuelziment de prime prove di concurs o a la date di scjadince pe presentazion de domande di partecipazion.
4. Se al ven fûr che i mancje ancje dome un dai requisîts di acès a la Pubbliche Aministrazion o al puest specific pes datis che a son in prevision, il candidât al ven eliminât in automatic de graduatorie in cualsisedi moment de procedure di concurs e di assunzion.

5. Une volte aciertade une incoerence relative ai titui utii pe atribuzion dai ponts finâi o pe atribuzion de precedence e/o de preference, la Comission e sbasse i ponts e/o e torne a fâ la graduatorie di merit.

6. Il Bant al pues previodi, volte par volte, plui mûts di presentazion de documentazion relative ai requisîts di acès, ai titui utii pe valutazion, ai requisîts par acedi a preferencis e/o a precedencis o a cualsisedi altre documentazion domandade tal bant.

### Art. 33

#### Risiervis e preferencis

1. Tai concors publics lis risiervis di puescj, descritis tal come 3 chi sot, za proviodudis di leç speciâls a pro di categoriis particolârs di citadins a van preventivadis tal Bant, stant ferme la aplicazion dal art. 16, secont come, de L.68/99 e in dut no puedin passâ la metât dai puescj metûts a concors.

2. Se, in relacion a chest limit, e covente une riduzion dai puescj di risiervâ par leç, la riduzion e ven fate in proporzion par ogni persone che e à dirit a risierve.

3. Se fra i participants declarâts abii te graduatorie di merit i 'ndi è cualchidun che al fâs part di plui categoriis che i dan titul a plui di une riserve di puest, si à di lâ daûr di chest ordin di prioritât:

- a) risierve di puescj a pro di cui che al fâs part des categoriis descritis de Leç dai 12 di Març dal an 1999, n. 68;
- b) risierve di puescj proviodude dal art. 3, come 65, de Leç dai 24 di Dicembar dal an 1993, n. 537, a pro dai militârs in ferme di leve sprolungjade e di volontaris specializâts des trê Fuarcis armadis congjedâts cence demerit a la fin de ferme (ancje sprolungjade) contratuâl.

4. I citadins che tai concors publics a àn dirit di preference a paretât di merit e a paretât di titui a son ta cheste liste chi sot:

- a) chei che a àn ricevude la medaie al valôr militâr;
- b) i mutilâts e i inabii che a àn fate la vuere;
- c) i mutilâts e i inabii par acjadiment di vuere;
- d) i mutilâts e i inabii par servizi tal public o tal privât;
- e) i vuarfins di vuere;
- f) i vuarfins dai muarts in vuere;
- g) i vuarfins dai muarts in servizi tal public o tal privât;
- h) i ferîts in combatiment;
- i) chei che a àn ricevude la crôs di vuere o a àn altris merits speciâi di vuere, e cui che si cjate a cjâf di une famee grande;
- j) i fiis dai mutilâts e dai inabii che a àn fate la vuere;
- k) i fiis dai mutilâts e dai inabii par acjadiment di vuere;
- l) i fiis dai mutilâts e dai inabii par servizi tal public o tal privât;
- m) i gjenitôrs vedui che no son tornâts a sposâsi, i oms e lis feminis che no si son tornâts a maridâ e lis sûrs e i fradis vedui o no sposâts dai muarts in vuere;
- n) i gjenitôrs vedui no tornâts a maridâsi, i oms e lis feminis che no si son tornâts a maridâ e lis sûrs e i fradis vedui no tornâts a maridâsi dai muarts par acjadiment di vuere;

- o) i gjenitôrs vedui non tornâts a maridâsi, i oms e lis feminis che no si son tornâts a maridâ e lis sûrs e i fradis vedui no tornâts a maridâsi dai muarts par servizi tal public o tal privât;
- p) chei che a vedin fat servizi militâr tant che combatents;
- q) chei che a vedin lavorât cun merit a cualsisedi titul, par no mancûl di un an te Aministrazion che e à bandît il concurs;
- r) i maridâts e i no maridâts secont di trops fiis che a àn di mantignî;
- s) i inabii e i mutilâts civîi;
- t) i militârs voluntaris des Fuarcis armadis congjedâts cence demerit de ferme o dal sprolungjament de ferme.

**5.** A parêtât di merit e di titui, la preference le da:

- a) il numar dai fiis di mantignî, nol impuarte se il candidât al è maridât o mancûl;
- c) la etât plui basse.

## **Art. 34**

### **Assunzion in servizi**

**1.** I candidâts che si cjatin in graduatorie tune buine posizion pe assunzion a vegnin invidâts, a mieç di raccomandade A.R. o di sicurade convenzionâl, a produci la declarazion nomenade tal precedent art. 32, e a cjapâ servizi dentri dal tiermin che ur ven assegnât. Se lis part no cjapin acuardis diferents, il tiermin nol pues jessi inferiôr a chel previodût dal Contrat Coletîf Regjonâl di Lavôr. Al à di vignî firmât il contrat individuâl di lavôr. La durade dal periodi di prove e gambie daûr de complessitât des prestazions professionâls domandadis e si le decît in sede di contratazion coletive.

**2.** In câs di fuarte urgjence e necessitât, se no si rive a aciertâ in timp che il candidât al à i requisîts che a vuelin pal acès al puest prime de assunzion in servizi, si passe a la firme di un contrat condizionât al possès reâl di chescj requisîts. La mancjance dai requisîts e je motîf di risoluzion dal contrat individuâl di lavôr.

**3.** Il vincidôr che nol cjape servizi cence justificazion dentri dal tiermin stabilît al jes de graduatorie di concurs. Se il vincidôr al cjape servizi, par un bon motîf, plui tart dal tiermin stabilît, i efîets economics a partissin di chê dì che al tache servizi.

**4.** In relacion a lis sôs esigjencis di caratar organizatîf e funzionâl, la Aministrazion e podarà meti in servizi i vincidôrs dal concurs un par un o a butadis, cun scjadincis che ur comunicarà ai interessâts e tal rispjet dal ordin di graduatorie.

## **CJÂF III – DISSIPLINE DI CHÊS ALTRIS MODALITÂTS DI ACÈS**

### **Art. 35**

#### **Cors Concors**

- 1.** Il cors concors al è un cors di formazion che al finîs cuntun concors. Il bant dal cors concors al varà di specificâ cuâi che a son i elements constitutîfs dal bant di concors public e:
  - a) cuâi che a son i requisîts, i mûts e i criteris di selezion pe amission al cors;
  - b) trop che al dure il cors;
  - c) trop che si à di frequentâ par jessi ametûts al concors;
  - d) trops candidâts che a vegnin ametûts al cors. Se il cors concors al è interni, la Aministrazion e à il dovê di favorî la partecipazion di plui int pussibil, tignint cont de pussibilitât di doprâ lis graduatoriis intant che a son validis.
  
- 2.** Il Dirigjent dal Servizi Gjestion dal Personâl al controle che i candidâts che a àn fate domande di amission al cors concors a vedin i requisîts che a coventin par jessi ametûts.
  
- 3.** A son ametûts al cors chei candidâts che a passin la selezion fate cui criteris dal bant.
  
- 4.** Finît il cors, la Aministrazion e amet al concors i candidâts che a àn frequentât almancul il minim des oris previodût dal bant.
  
- 5.** Une comission, clamade dongje cui mûts decretâts pal concors public e dulà che al figure, pal solit, almancul un docent dal cors, e selezione i candidâts di ameti al cors. A la fin dal cors la comission e soministre ai candidâts lis provis di concors stabilidis tal bant.
  
- 6.** Finît il concors, la comission e fâs buine la graduatorie e e cjape in servizi i vincidôrs, dopo che ur à fat firmâ un contrat individuâl di lavôr.
  
- 7.** Par dut ce che i inten a la valutazion dai titui, cuant che e va fate, e a la aplicazion des risiervis e des preferencis, a valin i stes criteris dai concors publics.

### **Art. 36**

#### **Personâl a timp determinât**

- 1.** Il personâl a timp determinât al cjape servizi cu la firme di un contrat individuâl di lavôr, cun chestis modalitâts:
  - a) ûs di graduatoriis, aplicazion des proceduris che si fevele tal art. 36 dal D.Legjislatîf 165/2001, dal D. Legjislatîf 368/2001 e des normis dai Contrats Coletîfs Regjonâi di Lavôr;
  - b) domande di un ciert numar di lavoradôrs al Centri pal Lavôr competent;

- c) par cuvierzi puescj di responsabil dai uficis e dai servizis, cualifichis di dirigjent o altris specializacions, implei des proceduris dal art. 22 dal Regolamento di Organizacion;
- d) pe assunzion di dirigjents o di altris professionalitâts che no son in organic, e che in dut no puedin superâ il 5% dal totâl de dotazion organiche de dirigjence e de aree direttive, implei des proceduris stabilidis dal art. 23 dal Regolamento di Organizacion;

2. La graduatorie par assunzion di personâl a timp determinât e reste valide par trê agns dopo de date di aprovazion e, dentri di chest tiermin, se e ven esauride cu la assunzion o cu la rinuncie dal ultin dai candidâts abii, e pues jessi doprade ancjemò par plui voltis.

3. Cui che al rinuncie a la propueste di assunzion a timp determinât al jes in vie provisorie de graduatorie, ma al torne a jentrâ tal stes puest se la Aministrazion e ves di tornâ a doprâ la graduatorie, daûr dal come precedent.

4. La candidate che no pues cjapâ servizi parcè che tal moment che e ricêf la propueste di assunzion si cjate tun periodi di interdizion dal lavôr par gravidance o par maternitât, daûr dai artt. 16 e 17 dal D. Lgjs. 151/2001, e reste te graduatorie te stesse posizion e e à dirit di jessi clamade in ocasion de prime assunzion seguitive.

## **Art. 37**

### **Assunzions mediant dai Centris pal Lavôr**

1. Pes categoriis e pai profîi professionâi dulà che e covente dome la scuele dal oblic, la assunzion e ven fate mediant dai Centris pal Lavôr competents sul teritori, che a inviin i candidâts ancje des categoriis ametudis a tutele de normative in vore.

2. Pal ordin che a rivin i lavoradôrs, une Comission, nomenade cui stes criteris des Comissions di Valutazion di Concors, ju somet a une o a plui provis cun chê di sigurâsi che a sedin abii a davuelzi lis mansions relativis ai puescj metûts a concors, cence valutazion comparative. Lis provis a puedin fondâsi sul ûs di struments o di altris machinis, che a van doprâts par chês mansions, o su simulazions di intervents in ciertis situazions o in sperimentazions lavorativis e/o suntun colocui a proposit des mansions dai puescj metûts a concors.

3. La tipologjie e lis materiis de prove o des provis a vegnin sielzudis cun riferiment a ogni posizion di lavôr relative ai puescj metûts a concors e comunicadis ai lavoradôrs.

